



菅 芒

山尾溜、崙頭頂、溪溝邊恰荒埔，無發柴樹仔的所在，攞會予一種號做菅芒的草仔佔去，這種稊孿仔稊孿、葉墘利利會割人的菅尾草，毋若臭賤爾閣誠會擋得拷旱日曝，便若落塗隨釘根發葉，歹運牢佇石壁縫嘛有才調生炭。對作穡人來講，伊是敗害種作閣誠歹治的雜草仔，大抱起來的老欖，就準講共剃頭剉甲光光光，全款無啥礙著，連鞭發新芽矣，著愛共規粒的老頭剉(thuánn)起來倒反，根盤現天(hiàn-thian)連繼曝兩、三工的大日，予伊的根脯(póo)去，才會應效。

毋過，顧人怨的雜草嘛加減有一好通取。佇清明的前後，會對根頭的所在發幼幼的新穎出來，這就是菅尾筍，欲挽愛擰刀仔，人向(ànn)低落去割，有淡薄仔費氣，擘殼過的新筍會使落鼎炒肉絲，駛猛火用蒜頭芡芳，顛倒是一粒一的料理，食過的人攞呵咾甲會觸舌。

大甲有夠在的菅芒佇白露彼跤兜，會先吐一穗尖尖、紅紅親像毛筆尾的花莓出來見人，聽候總開開(khui--khui)，規沿紅牙紅牙的海湧真正有夠孿；極加是一禮拜遐久，花會結子變焦焦，欲黜仔欲黜牢佇桎頂；風若較透咧，幼綿綿的花穗若搖若落，綴風颺颺飛，躡(lìng)起去半天懸，去所有會使停跤、歇喘的所在。

若有好心情，倚佇山邊斟酌看一絲一絲親像茫霧的菅芒花咧飛，心肝就會輕鬆爽快，袂輸雲尪按呢佇半空中連鞭徙東連鞭徙西，若準會當按呢浮上浮落，嘛是一種誠暢的代誌。毋過，獨獨是我爾，無半个人有這款心情倚佇遐杳杳仔看、寬寬仔享受過，敢講因對四籐輾轉樸實、臭賤的花草看袂上目，就無閒工去斟酌這款代誌，若按呢來比並，真正就差天恰地矣。是毋是我較實頭，干焦菅芒花就看甲戇神去攞無越頭，抑是別人無夠巧，袂曉轉鬚、欣賞，我嘛毋知。

作者：藍春瑞

☆詞彙學習☆

- | | |
|--------------------------|----------------------------------|
| 【才調】tsâi-tiâu：本領、能力 | 【紅牙】âng-gê：紅潤 |
| 【現天】hiàn-thian：朝天、向上 | 【欲黜仔欲黜】beh-lut-á beh-lut：要掉不掉的樣子 |
| 【芡芳】khian-phang：用蔥蒜爆香 | 【樸實】phoh-sit：誠實不浮誇 |
| 【一粒一】it-liáp-it：最好的、頂尖的 | 【實頭】tsát-thâu：頭腦不靈活 |
| 【彼跤兜】：hit-kha-tau：那個時候左右 | |

☆文法學習☆

- 【開開】：動詞+補語，表示（花）開了，唸法為 khui--khui，亦即第一個「開」字唸本調、第二個唸輕聲；「開開」若讀做「khui-khui」，則為形容詞，表示「開開的、開著的」，例如「喺仔開開」即為「嘴巴開開的」。